

Jaorverslag VVDS seizoen 2017-2018

2017-2018 was:

- Ut jaor van Prins Toffel d'n Urste, den vur de joeks ôk wel us Kevin genuumd werd
- Ut jaor van adjudante Willem en Mikey
- Ut jaor van Jeugdprins Sef d'n Urste
- Ut jaor van génne Jeugdprinses
- Ut jaor van enne Oelderse adjudant ien Câtele
- Ut jaor van schaduwadjudant Marc van de Ven
- en natuurluk ut jaor van (Martien): Ik bín genne roëkworst!

Ut bestuur bestond dit jaor uut:

- Vurzitter Emiel Evers
- Vorst Jop Loonen
- Penningmèster Robert Steeghs
- Sik Petra Raijmakers (eindeluk wer enne sik die wél Oelders kan schrieve)
- Bestuursleje . . . Han van de Sande, Rob Kunkeler, Marc van de Ven en Loek Arts
- en dansmarietjes Steffi Steeghs en Marloes Cox

De Raod van Elluf bestond uut:

Pascal Classens - Fred Peters - Roel Steeghs, Mark Steeghs, Rowan Wijnhoven, Paul Geurts, Sander Peeters, Daan Willems, Frank Steeghs, Wilbert Steeghs en William Steeghs

Zaterdag 11-11, opening

Ut 86e seizoen van de Spurriemök ging van start op zaoterdag d'n 11e van de 11e.

Prins Han en Prinses Elma stonte vur ut urst sins lange tied wer ien pak en moogte mit ut ienzègene van de Mök ut seizoen offiesjeel opene. Hiernao han we enne groëte verrassing vur os raodslid Pascal Classens. Hej was 11 jaor bej de club en wier daor terecht vur onderscheidde ien de orde van de Bronze Spurriemök. Zonder dat Pascal en Lizzy ut wiste hebbe wej durvur gezurregd dat beide elders op ut moment surprème ok anwezig ware. Ut was nog wel effe spannend of Lizzy zelluf op tied zeuj zien. Normaliter is zej altied, same mit Pascal, as ieën van de urste anwezig, mar dizze kier bleef zej uut. We hebbe toen Marloes ien motte schakele um Lizzy op tied ien de kroeg te kriege. Zej is snel uut bad gestapt, angekléjd en naor de kroeg gerend. Toen zej ut böske kreeg ware zôwel de bloeme as Lizzy nog goed vochtig. Vrejwel ansluutend hebbe wej 2 meense an ollie vurgesteld. Te wiëte Petra Raijmakers, ozze néje sik, en Steffi Steeghs, os néj dansmarietje. Ze hebbe zichzelluf ludiek geprissentieërd middels un groëtendieëls vurgekauwd stukske tekst. Hiernao hebbe we nog un kwis gespeuld mit alle anwezige, oftewel Ren-je-rot. Nao un haffel zeer intelligente vraoge gesteld te hebbe bleek Stef Claessens gewonne te hebbe op enne zeer vâge manier. Pèst presies bej Stef. Verder enne rustige aovend mit veul ouwehoere. De kop was dur af! Klèn kalamiteitje was dat iemes ozze mök mitgenome haj, mar helaas haj niemes dat gezien. Kwiet dus!

Zaoterdag 18-11, ut Vorsteraodsbal

Dit jaor wier ut vorsteraodsbal gehalde bej ut Dartele Veule. Wej han bewust enne bus geboekt zónder Casele. Echter op ut lèste moment wôn de Schanseknuppels toch ger mit os mitréje, zoë kôsse wej same 2 tientjes korting kriege. Umdat wej ut idee han dat ze ut anders nie kôsse betale hebbe wej aover os hart gestreke en zien we mit frisse tégezin same hin en terug gereje. De buschauffeur begos un hiël verhaal te vertelle aover wat hej un wèk daorvur haj mitgemakt mit de Schanseknuppels ien de bus. Hej haj ut dur vort hiëlemaal mit gehad. Wej wisse presies hoe dat vuult. Wat néj was dit jaor is dat de Vorste mit mekaar mosse battele ien plats van 7 minute allieën praote. Ozze Vorst Jop wier gekoppeld an Vorst Rob van de Pielhaas. Enne prima battle den vollegde mit veul snere naor mekaar, mar ok mit veul respekt vur mekaar. Betreffende koppel was mit afstand de beste van d'n aovend. En dat zegge wej níe umdat ozze Jop mit deej, dat zegge wej umdat alle anwezige dat vonde. Un gezellig fieësje vollegde en laat op d'n aovend drope wej zeer tevreje af.

Zaoterdag 9 december, Sterreparade Bergen

9 december zien we mit enne mojje dillegasie naor de Sterreparade ien Bergen gewist. De Knöllekes uut Leüne hebbe os netjes mit de bus opgehald, wéj zien nameluk wél welkom bej andere ien de bus. Un zeer gezellig fieëst, en dizze kier bleve álle vère hieël. Ien ut verleje is dat daor wel us anders gewist. Mark Steeghs droeg op ut end van de aovend de prinsessemantel en danste dur lekker op los. Mit zien losse heupjes liet hej mennig hartje sneller kloppe, zoëwel bej de vrollie as bej de kèls. Mark ziene leus luujde dan ok: Ge werd vanzelluf un bietje bekender, as transgender!
En goed vurbild duut goed volge.....

Woensdag 27 december, kraomvisite

Twieë raodsleje van ôs han gezurregd vur néje ienwonerkes. Paul en Mel mit Janne en Loek en Sylvia mit Femm. Prins Han en Vorst Jop zien op ieëne aovend bej beide stelle op kraomvisite gewist. Bejzonder te nuume was ut feit dat dizze kier bej ut bezuuk de néje mökskes nog nie zelluf de deur ope kôsse doen!

Zaoterdag 30 december, Prinsraoje

Dizze'n dag was wer ut jaorlukse prinseraoje, en zellufs zónne Prins was mierde male goed geraoje. Alle winnaars zien beloond mit prieze waor zellufs de Postcodeloëterej un puntje an kan zuuge.

Zondag 7 jannewarie 2018

De urste zondag van ut néje jaor. Hiel Oeldere wet sins jaor en dag wat dur dan stöt te gebeure. Urst ut afbrèke van Prins Han en Prinses Elma. Same hebbe ze dur un wérelde seizoen van gemakt. Nao un moj dankwoordje van Vorst Jop wier de proclamatie uitgereikt, en ok dit jaor was den wer kei goed gelukt. Daornao was ut natuurluk tied vur de lèste speech van Prins Han d'n urste. Vurdut Han wier opgenome bej de APK mos hej enne test aflegge. Hej mos verschillende Oelderse weurd ontiefere en zoë zien lidmaatschap bej de APK verdiene. Gelukkig mar dat de vraoge hiël mekkeluk ware. Zien versiersele wiere afgenome en same zien ze opgenome bej de Ald Prinse en Ald Prinsesse. Hiernao was ut snel tied um naor de Liende te gaon. Umstreeks 15.11u startte wej mit un introduksie-fillemeke ien de zaal. En zoëas gillie dat van os gewend ziet, schein de rommel dur naor enkele minute mit uut. Ditmaal was ut nie de beamer kabel, mar de laptop. Pascal woj uut paniek direkt de deure van de bühne opene um verder te gaon. Gelukkig hebbe wej dit nie gedaon, anders haj ut Trio zoëwat pinneke naks ut podium op gemotte. Nao enkele zogenaamde belangrieke updates van de kompuuter kôsse wej gelukkig wer verder. Ut prachtig gemakte filmke van de Glowmovies, oftewel Rik Kleeven en Jesper Weijs, liet zien hoe grúun de potensjele prinsekandidate wél of nie ware. Dit leverde enkele hilariese beelde op. Daornao ging dan toch de bühne ope, waor enne kei mojje en gruune supermerit tevurschien kwaam. De kemissie haj koste nog moeite gespaard um un prachtig dekor te bouwe, oftewel de Mökster! Diverse bezuukers bezochte ozze winkel en name diverse produkte mit. Dur wier veul gratis uitgedèld, dus vanzellufsprèkend was ut hartstikke druk. Umdat ut zo druk was zocht ozze Vorst enne filiaalmanager. Nao un klèn kwartierke haj hej dees gevonte. Uut enne bak vól mit gruntes kwame spontaan tevurschien :
Prins Toffel d'n Urste mit zien adjudante Willem en Mikey! Enne mojje speech, gans uut de kop, den vollegde. Anslutend enne polonaise en gauw zat ging de bühne wer ope vur ut uitkomme van de jeugd. Alle jeugdraodsleje mosse ien ozze Mökster raoje wat dur efkes van te vurre allemaol aover de loëpende band was gerold. As ge niks mer wist, vielde af. Uteindeluk kwaam tusse twieë winkelwagetjes ien Jeugdprins Sef d'n Urste ut podium opgerold. Dit jaor helaas genne Jeugdprinses, daorentege wel enne kei enthousiaste Jeugdprins én Jeugdraod.
Oeldere was blie mit de néje hoëghede en same vierde we nog efkes gezellig fieëst.

Saoves bezochte wej zoëas gebrukeluk de Soos. Normaliter verzamele wej os, waornao we sáme naor onder gaon, mar ozze Prins was al flink vuruut gerend en haj de urste polonaise dur al op zitte toen de rest ankwaam. Jeugdige enthousiasme zulle we mar zegge. Ut eier ète bej ozze Prins verliep prima. Karlon Cox vroeg zich daor mierdere male af waorum altied enne Prins uitgezocht werd, mar genne Prinses? Allieën enne Prinses kan toch ok? De manier waórop Karlon dit mierdere male dur ut ganse huus hin kwakte, is presies de réje waorum wej dit nie doen. Ien de kroeg slote wej dizze zeer mojje en intensieve dag af, waor ut nog lang druk en gezellig bleef.

13 Jannewarie, Ald Wieverbal

Ok dit jaor wer hartstikke druk, mar misschien nog wel belangrieke: ok wer hartstikke gezellig.

De kammaraöj van ut Prinsetrio ware hiervur spesjaal teruggekomme van vriendeweekend. Verklèd han ze zich nie, mar ze han wel enne groëte partytent bej ur um ut vakansiegevuul toch un bietje te behalde. Winnaar bej de groëte groepe was de buurt Hoëgeweg. Zej ware verklèd as jagers mit as thema 'wej jage den knuppel weg'. Doelend natuurluk op Maikel Wennekers den as rasechte Spurriemök adjudant is ien Casele. How low can you go? Aover knuppels gesproke, die kwame os nog effe bezuuke. Daorbej stonte ze opnéjt af te kieke hoe ge écht fieëst mot make. De band N'rgy, of Knallerman, of wél N'rgy of stiekem tóch Knallerman? Hoe dan ok, ut was enne knaller van enne aovend! De eikes bej Daan en Marloes ware lekker en langzaam wier daor de basis gelet vur ut toekomstige topnummer: Marc van Ven, van de Ven. Dat ut wer laat geworde was, was wer op te make uut ut feit dat adjudant Willem ziene muts smergesvroeg bej Marloes ien bed lèj. Gelukkig was ut nie andersum!

19 en 20 jannewarie, Bonte Aovend

Goh, wat kunne we wer trots zien op os eige. Bejna allieën mar eige artieste en dan ok nog us stuk vur stuk op ur eige manier allemaol leuk. Nao de opening kwaam de jeugdraod van vurrig jaor ut podium op. Ze speulde un stel bejaarde ien un verzuringstehuus en liete zien hoe ut dur straks an toe kan gaon. Leuke act en veural belangriek: jong geliërd is ald gedaon. Daornao kwaam enne Caselse Dansgroep de bühne op mit daorbej os eige Bente Zanders. Ut programma kreeg zaoterdays enne verrassende wending toen Marco de Mulder de microfoon vroeg. Zoëas wej ut van um kenne brocht hej op zien bekende manier enne leuke mop. Kei moj dat hej anwezig was en hej liet zien dat niks of niemand um ziene humor kan afpakke. Ansluutend was de APK an de beurt mit: kumt enne kèl bej de dokter. Dokter Tontje kreeg de mest gekke tiepetjes en vraoge an zien praktijk. Absolute högtepunt was hierbej natuurluk ut genèze van de Prins van 2011. Hej aovertuugde zichzelluf mit de legendariese weurd (Martien): Ik bín genne roëkworst!

Hiernao verzurregde Showdrums Oeldere onder leiding van Bart Jeuke un moj stukske muziek. Toen kwaam dur enne brandweerman de buutton ien umhoëg geklomme. Hej stond letterluk en figuurluk te trappele um zien ervaringe te dèle. Hej lei os ut vùur an de schene. Enne prima buut dur os eige Frank Steeghs. Hiernao vollegde de Kroegtijgers, oftewel de vriendegroep van os Prinsetrio, mit un schitterend debut. Zej persiflierde diverse Oelderse typetjes. Jan en Anita, Gerrit en Paula, Rietje, Huub Ronge, Meneer Pastoer (mit totaal gèn aoverdreve groëte oëre), ze kwame allemaol de kroeg binne um wat mojs te vertelle. Op enne ludieke en hilariese wieze brochte ze un stukske herkenbaarheid, waar ut publiek zeer enthousiast aover was.

Nao de pauze vollegde un waar spektakelstuk! Venrods bekendste volkszanger Gèr Jansse was aovergevloge um bej os un paar nummerkes te make, euh.... te zinge! Uut volle borst zong hej enkele topnummers waormit hej de hiële zaal an't swinge kreeg. Prins en adjudante kregte natuurluk enne lekkere zoen, waornao hej onder ien de soos nog wat tillefoonnummers uutwisselde mit o.a. Stan Sanders. Wat hebbe wej, mar veural héj, durvan genote! Gelukkig was de durpspolitiek dit jaor wer teruggekierd ien de vurm van Oeldere Drèjt Durrrrrr. Boer Ruud, Boer Ruud en Ruud d'n Boer nome same mit prissentator Dennis op enne scherpe en humoristiese wieze dur, wat dur afgeloëope jaor allemaol gebeurd was ien Oeldere. Hiernao vollegde wer enne Dansgroep mit ozze eige Nicole Geurts. Enne welkome afwisseling op de bühne. Ansluutend kwame de toiletboys mit enne verrassende act. Onder toeziend oëg van enne zeer charmante toilet dame wier dur op de bühne flink en goed gebruik gemakt van un toilet. Hiernao ging betreffende dame zich opmake ien enne zogenaamde spiegel, an de andere kant van de spiegel gebeurde presies ut zellufde, mar nie hiëlemaol. Ut leidde tot zeer grappige tafferele. Moj bedocht en goed gebrocht. Hiernao was ut de beurt an Jos en Ingrid. Ingrid as Drika en Jos as Handrie ut Boerké of Boerká? Zei ik toch, zei hej regelmaotig naodat Drika um wer us verbèterd haj. Gevatte grappe umliëst ien enne leuke act. Pech han ze mit ut geluid, waordur ze efkes van ur apropos ware. Eigeluk mug dit nie gebeure, des te knapper is ut dat ze gewoën durspeulde en ur act tot un goed end brochte. Afsluuter dit jaor was Marco Swiggers. Ieërluk is ieërluk, ut was genne échte topper. Mar op enne tóch verdienstelukke manier brocht hej leuke grappe en enkele liedjes die de zaal snel begos mit te zinge. Högtepunt was de ode die hej brocht an Paula. Tekst hiervan was iengestuurd dur Gerrit den ut zelluf nie durfde te zinge. Bej ut durzakke hiernao ien d'n Terp vollegde wederom miedere male enne serenade an: Marc van de Ven, van de Ven.....

Woensdag 24 jannewarie, Circus Mök

Vur ut twedde jaor op rej zien wej op de woensdagaovend naor Circus Mök gewist. Traditioneel is ut dan d'n aldere-aovend, dus hebbe wej de gemiddelde lêftied wer flink umlieëg gedrukt. Mit uutzondering dan van Rob Kunkeler. Ut programme was de lêste jaore ronduut nîe goed te nuume, echter hebbe we now motte konstatiere dat ut programme best wel goéd was. Ut liep allemaol moj dur en mit Rob Scheepers op ut end ziedde verzekerd van spektakel.

Zaoterdag 27 jannewarie, Senioremiddag

De Oelderse Kóst was dit jaor getransformierd ien de Senioremiddag. Enne schônne middag spesjaal vur de échte aldere binne Oeldere. Zurregboerderej de Hofsteeg van ozze William was enne prima lokasie um same mit de aldjes enne bingo te speule. Nao enkele rondes haj zôwat iederieën pries. Leuke mutsjes, grappige brillen en slingers um te hange. Um op zonne lêftied nog versierd te werre deuj iederieën zichtbaar goed. Jopie en Ewald, oftewel de twieë hardwerkende ambtenare, name ut Prinsetrio en veule anwezige nog effe flink op de korrel. Wil Pieëters verzurregde ôk dit jaor wer de muziek en Jos Loonen was anwezig um de aldjes te vurzien van un natje en droogje en sloot af mit enne wereldse mop. Kortum: enne gezellige middag den zeker vur herhaling vatbaar is, zoë konstatierde ok enne super-aoverenthousiaste Karel en Hay.

Saovens Prinsereseptie. Vur ut urst han we de resepsie van de groëte en klène Prins uut mekaar getrokke. Ien ut verleje was dit idee dukker geopperd, mar toen durfde wej ut nog nie an. Dit jaor dus beslote de uitdaging an te gaon en ut bleek un geweldig sukses. De resepsie van de groëte Prins is prima bezocht waarbej veural de gezelligheid opviel. Nao ut offiesjele gedielte duurde ut un paar minuutjes vurdut ut op geng kwaam, mar toen de DJ ieënmaal geholpe wier dur enkele verzuuknummerkes, brook ut fieëst los. Tot op d'n dag van vandaag is dur twiefel aover hoe d'n Dj now eigeluk hiette. DJ Rico, DJ Nico of toçh Star DJ Dennis. Op de uutnuëdiging van de resepsie stond ut ien ieder geval verkierd, óf toch nie. Ieën ding is zeker: nao enkele verwiete en elkaars adres zien uiteindelik ien intensief, goed en mondeling aoverleg Rowan en William tot de konklusie gekomme dat de onderlinge communicasie wellicht nie hiëlemaol gans ien super-optimale staot was. Ut moog de pret echter nie drukke, want alle anwezige han bieëstig veul schik. Ut schient zellufs dat wej de Liende hebbe angezope. Ruum dúúzend consumsies mier as ut jaor durvur. Daags daornao haj ik ut gevuul dat ik daor persoënluk verantwoordelik vur was. Ozze Prins was aangenaam verrast dur enkele prachtige kadoos, waaronder natuurluk ziene opblaospop. Ut schient dat den alwer bej ut afval lit.....vol = vol! Oh jao, en natuurluk wier ozze groëte vriend Marc van de Ven ok daor wer luidkeels toegezonge.

Daags daornao jeugdresepsie. Enne middag den eigeluk best wel goed bezocht was. Veul familie en bekende van ozze Jeugdprins en ok nog enne hoëp aoverige bezuukers. Leuk was dat dur 2 kolleega-jeugdverenigingne kwame buurte, Casele en Leüne. Ok kwame de Ysselsteynse Pielreuze zôwel ôs groëte Trio as de jeugd fillesetiëre, waarbej ze as kado flink wat muntjes han mitgenome van de Jera. As wej volgend jaor, néve enne Jeugdprins, ók wer enne Jeugdprinses hebbe, én wellicht ok wer enkele andere verenigingne op bezuuk kriege, is de zaal zô goed as vol. Op beide resepsies kunne wej zeer tevrije terugkieke.

Vrejdag 2 fibbrewarie, Ald Wieverbal Casele

Umdat wej nîe anwezig kôsse zien op de resepsie van Prins Bassie en Adjudante Maikel en Marcel zien wej wisse buurte op urre Ald Wieverbal. Daor hebbe wej effe un hendje gegêve en staon konstatiere dat dur afgeloëpe jaore wennig veranderd is. Enne aparte bend, naogenoeg gèn polonaises en veul verenigingne uutgenuëdigd um de zaal te vulle. As kado han we bej os enne volle zak munte, wej hebbe dur mar nie bej gezet dat dees al enkele jaore ware verloëpe. Mit 2 iengehuurde Oelderse tappers én ieëne iengehuurde Oelderse ober kwame wej daor bejzonder wennig tekort! Same zien wej uiteindelik teruggefietst naor Oeldere, uitgezonderd ut Prinsetrio. Die han enne taxi geregeld. Um halluf 2 stond den taxi te wächte, mar ut Trio haj nog genne zin. Taxi wég mit as gevolleg dat ze tusse 5 en halluf 6 mar naor huus zien geloëpe. Schrale troost was dat ze nog eier gegète hebbe bej enkele super-enthousiaste meense, die ze bej-god nîe kende.

Zaoterdag 3 fibbrewarie

Smergesvroeg begos de urste edisie van Jeugd-Expeditie Mök. Enne prima verzurregde dag geregeld dur de kemissie Expeditie Mök én mit veul hullep van de jonges en megjes van de Soos, waarvur dank. De veule kiender hebbe ien diverse grupkes hard gezocht naor de mök. D'n uutslog was nog nie te raoje, waordur ze mosse waagte tot maondagmiddag mit carnaval. Dees urste edisie ging van start op ut durpsplein mit enne méga-knal waordur alle ienwoners van ut Hofplein zich wer efkes ien 1944 waande.

Umstreeks 12:00 wier offiesjeel de néje carnavaleskrant uutgereikt an os hoëghede. Daornao ginge we mit os kammeraöj rond um dees te verkoëpe. De krant zaag dur ok dit jaor wer hiël goed uut en wier ongevèr net zo goed verkocht as andere jaore. Apart te nuume was utgeen Martien Steeghs aoverkwaam tiejes de rondgang. Hej belde an bej Waldina Jacobs, nota bene un ald dansmarieke van de Spurriemök. Urre meens verzocht Martien op enne ongepaste en brutale manier um gauw wer te vertrekke. Misschien kwaam ut durdat Martien bej opening van de deur in plats van 'goejemiddag' hiël hard zei (Martien): Ik bín genne roëkworst! Uuteindeluk hebbe zej excuses angebooje en hebbe ze alsnog enne krant gekocht!

Saovens Verklèdbal ien Ysselsteyn

Mit enne supervolle bus zien wej naor ut verklèdbal ien Ysselsteyn gereje. Nie allieën de ganse raod, mar halluf Oeldere haj zich opgegève um mit gaon. Mit enne dikke 70 man stapte wej de bus uut en liepe ien polonaise zoë zaal binne. Enne bewuste aksie umdat wej wisse dat ze daor entree vroege. Wej han daormit de grötste lol, echter de kastelijn was hiermit op zien zachts gezet not amused. Hej liet zich gruweluk kenne dur ozze Vorst an de jas te trekke um alsnog entreegeld te eise. Hej ging vurbej an ut feit dat wej den aovend mit zien alle vur ongevèr nét zoveul geld an bier zun gaon zoepe as de complete jaorbegroëting van Casele. Nope, hej stónd durop dat ie zien paar eurootjes terug kreeg. Ozze Vorst koos eiere vur zien geld en betalde gedieëlteluk uut eige tes un bedrag ter tegemoetkoming. Judith Bardoel het latternao nog gekollektieërd um dit bedrag terug te betale an Jop. Enne leuke aovend waarbej wej os wer naodrukkeluk op de vurgrond hebbe geprofileerd mit onder andere, ienmiddels os huuslied: Marc van Ven, Van de Ven. Op tied ginge we naor buute um de bus te kunne hale, sterker nog, hej was dur nog nie èns. Uut vervèling begosse wej mídde op straot mar Oeldere mien durpke te zinge. Dankzej 70 keurig gestemde keeltjes ginge al snel de urste slaopkamerlempkes an. Snel daornao kwaam de bus, die eigeluk alsnog te laat vertrok. Dit kwaam durdat de Prins en Vorst van Ysselsteyn os ien de bus nog uitgebreid kwame bedanke vur ozze positieve ienbreng den aovend. Toen wej terugkwame zage we vanuut de bus dat de verlore Mök wer terug was. Ut ding jatte terwiel niemand ut zaag en ut ding zónder tegeprestatie terugbrengte terwiel niemand ut zaag. Goh, wat mot hej of zej un lól gehad hebbe.

Donderdag 8 fibbrewarie, bezuuk SJMO

Zoëas gebruikeluk ware wej wer uutgenuëdigd um hierbej anwezig te zien. Wej hebbe gehost en gedanst op prima verzurregde muziek. Ansluutend koffie gedronke en wej realisieërde os dat de carnaval now écht begonne was.

Vrejdag 9 fibbrewarie, bezuuk schól

Ut schólbal werd zoëas afgesproke vort um en um gehalde. Ut ieëne jaor ien de Wis, ut andere jaor ien de Liende. Dit jaor wer ien de Wis. Begin van de middag slote wej an bej alle fieëstvierende kiender. Polonaises en optrejes wisselde zich af waarvan wej allemaol genote. Prins Toffel en vuzitter Emiel mosse tigge mekaar battele. Wie ut urst zien schoën mit veters kos losmake en uuttrekke én daornao wer snel antrekke en strikke haj gewonne. Emiel haj alwer twië tasse koffie uut toen Toffel hiermit ók eindeluk klaor was. Toen Prins Bassie op ut podium stond vur ziene battle zage adjudante Willem en Mikey urre kans schôn um ongezien de scepter van Prins Bassie te griep. Ien plats van sportief te reagiere, en as tegeprestatie os un blad bier an te bieje, begos hej ongeluëfeluk te miemere. Hej vond ut genne gepaste aksie. Umdat ie mar bleef knôjje en miemere kreeg ie ziene welverdiende titel: Prins Bassie, mimimimimimi. Dengene die hiermit ut hardste lachte was Prins Toffel, terwiel ie nota bene zelluf zien scepter mimimaal 7x is kwiet gerakt. Héj reagiert dan wél verstandig en berèkenend, zeg mar enne Adriaan. Ansluutend hebbe we nog 2 pilskes gedronke ien de Köster en nog un paar mier ien D'n Terp.

Saovens op ziekebezuuk.

As urste zien ozze Vorst en Trio bej Meneer Pestoër gewist den mit enne flinke longontstèking ien ut ziekehuus lèj. Zoëas gebruukeluk han ze un böske bloeme bej ur, mar dat moog absoluut nie op den afdieëling. Toffel loste dat moj op dur naarstig op zuuk te gaon naor Venrods bekendste ziekehuusmedewerker Gèr Jansse en aoverhandigde um ut böske bloeme. Dit lèste is geloge, echter het Toffel mej ien vetrouwe verteld dat hej dit ut liefste wel gedaon haj. Toen ze ankwame bej de kamer van meneer Pestoër lèj hej op ieën oër, hej schient gèn kusse nuëdig te hebbe. Toen ie wakker was krieg ie van ozze Prins enne jaormedallie waar ie errug blie mit was. Efkes daornao zien ze mar wer snel gegaon, want ze han ut idee dat pestoër dur zoëmar us tussenuut zeuj kunnen kniepe op dat moment. Ansluutend zien ze op bezuuk gewist bej Annie Steeghs an de Getrudisstraot. Ozze Vorst Jop haj tiejes de krantverkoëp Annie zurgvuldig angereje um dur zeker van te zien op ziekebezuuk te kunne.

Zaoterdag 10 fibbrewarie

Terwiel ut Prinsetrio smergesvroeg zaat te ontbijte ien de Soos begos de ganse raod de zaal ien te ruume en alles klaar te make vur de carnavalsdaag. Dit verliep eigeluk allemaol vlekkeloos. Paul deej hierbej enne spraakmakende en opzienbarende ontdekking. Bej ut ienstalliere van de afzuuging ien ut stoelehok zaag hej ienèns hoe de ventilator wél angeslote mos werre. Dit jaor han we dur dus écht wat an. Ien ut verleje han we ut idee dat we mier roëk anzooge as afzooge. Wej wiëte nie van wie Paul ut zuuge gelierd het, mar dengene zien we dur zeker dankbaar vur. Vorst en ut Trio zien daornao op bezuuk gewist bej ut jongste mökske. Dizze kier bej kermismiep Marietje en Dennis mit zoëntje Dylano, woënegtig aagter Vitelia. Zej ware angenaam verrast en kösse ut bezuuk mier dan wardiere. Begin van de middag zien we naor de Schouwburg gegaon vur de ienstallasie van de Prinse. Alle verieniginge mosse kriskras dur mekaar gaon zitte vur de verbroedering, dit haj volges os totaal genne zin. Typies wer zôn raar Venrods idee. Programma daor viel un bietje tege, mar de Prinse van de kerkdurrepe kregre mier aandacht as oeïts tevurre. Pluspunt dus. Hiernao zien we naor buute gegaon um wer effe sfeer te preuve bej ut lensjekke. Hier gebeurde utzellufde as alle vurgaonde jaore. Vorst Jop stond uutbundig te juiche en de rest van de raod stond chagrijnig toe te kieke. Motverdorie wat was ut druk. Toen we ginge hebbe we dur un halluf aover gedaon um bej de parkierplats te komme die 25 mèter verderop lèj. Ut was haost nèt zo druk as bej un concert van Venrods bekendste volkszanger Gèr Jansse ien de Amsterdam Arena.

Saovens bezóchte wej de kerk waar Paoter Wilms op enne keurige manier ozze zieke meneer pestoër verving. Wil Pieëters zurregde vur un stukse muziek en ozze Vorst sloot af mit enne goeje speech, waorien hej zich al alvast exkusieërde vur allie kiere die hej te laat ging komme. Daornao was ut alwer tied vur ut Expedisie Mökkebal. Ut begos wer op tied en de opkomst was wederom prima te nuume. Onder de klanke van de Towerband wier dur wer flink gehost. Wat hierbej opviel, veural bej Prins Toffel, was vervangend zangeres... Chrissy! As zej zich daor nèt zô duk haj motte uutkléje, as dat alle raodsleje dat ien gedachte al gedaon han, kwaam dur van zinge niks mer terecht. Ut Trio opende de aovend mit ur eige nummer waar op ut lèst vanzellufsprèkend Marc van de Ven, Van de Ven gezonge wier. Ut Trio sloot de aovend mit ut ète van de urste eikes, waornao Toffel nog lang stond nao te kletse mit Chrissy. Hej probierde ur recht ien de oëge an te kieke, echter dwaalde zien uëgskes telkens un klèn bietje af naor benéje. Hiermit kwaam enne prachtige dag an zien end.

Zondag 11 fibbrewarie

Nao lang uutgeslaope te hebbe verzamelde wej os bej D'n Terp um zoëwel ozze klène as groëte Prins thuis af te gaon hale. Um de ieën of andere wazige, nog steeds nie te verklaore, reje stond de carnavalswage al zoëwat bej Toffel geparkierd. Pas sins 86 jaor verzamele wej os mît de wage bej D'n Terp, dus ozze Vorst stónd durop dat de wage daor snel op an kwaam. Wej zien toen same mit de Mök is Los de hoëghede gaon ophale, waornao we os direkt hebbe kunne opstelle vur d'n optocht. Tenminste as ge dat enne optocht kóst noeme. Gelukkig han enkele grupkes de moeite genome um mit de doen. Korte optocht mit wennig dieëlnemers, vurdie durvan is wél dat we des te mier kiekers han. Toen de prieze verdèld ware ginge we aover naor de opening van de Jeugdvastelaovend. Nao de speech van Jeugdprins Sef ging tot ozze groëte vreugd de jeugdraod bej os ien de nek. Enne zeer gezellige middag mit enne baove-gemiddelde opkomst. Dj's Eric en Ruud han ut wer prima vur mekaar. De manier waarop zillie bezig ware, mit zoëwel jong as ald, was zeer fraai te noeme.

Halló allemaal, wat fijn dat je er bent..... zoë mosse veule anwezige zich vurstelle én daornao de volgende wer ien de polonaise mittrekke. Toen ze ankware bej Martien Steeghs zei den, ien plats van zich vur te stelle, (Martien): Ik bín genne roëkworst!

Begin van de aovend kregeweij ien de bestuurskamer brödjes mit lekkere goulash. Prima verzurregd dur ozze Sik Petra mit un bietje hullep van Lizzy. Dur is direkt un kontrakt angeboje vur ut ankommend jaor. Ut was zô lekker dat de kans groët is dat ik volgend jaor iencognito, verklèd as raodslid, rond dat tiedstip de bestuurkamer ien sluip. Ien de Soos was ut wer ietsjes voller as vurrig jaor en alle kiender din moj mit. Dizze'n dag slote wej af dur nog lang te blieve hange ien de kroeg, waor ut bruurke van ozze Fred presies de goeje muziek drèjde. Bart deej ut hartstikke goed.

Maondag 12 fibbrewarie

D'n dag begos mit ut snotneuzebal waor de allerklènste zich wer prima vermakt hebbe. Ut ware dur nie hiël errug veul, mar ze hebbe zich wel goed geamusieërd én blie ware ze wer mit de ballonne op ut lèst. Smiddags trokke wej mit ozze néje, best wel hiële mojje, carnavalswage mit ien d'n optocht van Venroy. Baovenop de wage bleve ze an't hosse en springe. Wej vraoge os nog steeds af of dat dat kwaam durdat ze zich zô naodrukkeluk wôn profiliere an de jury óf dat ut kwaam durdat de vloer waor ze op stónte 100 graode celsius was dankzej enne aoverblaste aggegraat den krek onder hun vuut stónd. Vanwege de wálm ginge zej kompleet uutgerôkt huuswaarts, behalve Vorst Jop, den is noeit uutgerôkt. Ien de Liende zien daornao, middels enne mojje prissentasie, de winnaars van Jeugd-Expedisie Mök bekend gemakt. Ok is wer ut befaamde scepter-spel gespeuld, waor enne winnaar aover bleef naodat alle ándere kiender stuk vur stuk afgevallen ware. Heerluk um te zien die snuutjes....as ze verlieze. Enne rustige middag waorvur gelukkig nog veule de moeite genome han um efkes te komme. Ok hiernao hebbe we nog lang durgefieëst ien ozze klène Mökkestal.

Dinsdag 13 fibbrewarie

Vur de jonges van de raod, inclusief de vrollie en eventuele kiender, begos d'n dag mit de befaamde brunch ien d'n Terp. Ok de Mök is Los was hierbej uutgenuëdigd. Same hebbe we wer volop genote van al utgeen Paula en medewerkers vus ôs hebbe staon koke. Hiernao wiere terecht Gerrit en Paula efkes ien 't zönneke gezet. Vanwege de brunch, mar zeker ok vanwege alle kiere dat zej vur de Spurriemök klaor staon, en dat is eigeluk áltied. Hiernao vollegde ien de Liende de ienmiddels tiende edisie van de Buutegewoëne Binnezitting. De stroëm bleef dizze kier án waordur alle artiëste aagter mekaar de Bühne op kôsse. Opnéjt un leuk programma mit diverse verrassende artiëste, zoëas de kemissie BBZ zelluf, de boere van Oeldere Zuid-Oost, un paar Ald Prinsesse, de jonges en megjes van jeugdtonieël, ut Cásels Trio, de Venrodse cd-artiëste, Muziekvereniging Ons Genoegen, de jeugd van Oeldere Zuid-Oost, de kammeraöj van ut Prinsetrio, de gezinsleje van Jeugdprins Sef en ôs eige Trio mit op ut lèst natuurluk prominent anwezig schaduwadjudant Marc van Ven, Van de Ven. Schitterend dat d'n opzet nog altied zô moj werrekt. Ut schient dat dur twieë artiëste zichzelluf al angemeld hebbe vur volgend jaor, waaronder Venrods bekendste volkszanger Ger Jansse én Martien Steeghs den zelluf un nummer an't schrieve is mit de volgende titel: (Martien) Ik bín genne roëkworst!

Vrejwel aansluitend zien we ien de zaal gaon sluute mit de jeugd. Ut lukte ozze Vorst um de hiële zaal stil te kriegen, presies zoëas ut huurt. Jeugdprins Sef sloot af mit wer een prima speech. Opperhoofd Pascal van de jeugdkemissie bedankte de ganse jeugdraod mit ien ut bezonder Jeugdprins Sef, waornao hej enne mojje proclamatie kreeg uutgereikt. Iederieën bleef lang plekke en via de brödjes knak en hamburgers belande wej uiteindeluk allemaol ien d'n Terp. De Jeugdkemissie, Vorst en Trio ginge nog effe naor de soos um daor alles tot un goej end te brenge. Nao 4x ut lèste nummer gehuurd te hebbe wier buute de jeugdvastelaovend afgeslote dur ut verbrande van mök. Ondertusse was ut ien d'n Terp akelig vol geloëpe. Rond halluf twelluf begos Vorst Jop langzaam mit ut sluute van de Vastelaovend. Marloes wier bedankt vur ur ienzet as dansmarietje. Zej was ieën van de initiatiefnemers hiervan en vond ut nao 3 jaor moj gewist. Hiernao was ut de beurt an Rowan. Hej was ienmiddels 4 jaor bej de raod en haj ok beslote dur mit te stoppe. Rowan het ien diverse kemissies gezète en daor enne goeje bejdrage an geleverd. Jop bedankte um vur ziene ienzet, waorvur hej terecht un groët applaus kreeg. Rowan het wel angegève gèr te wille hellepe mit ut jubileum.

Hiernao ware Emiel en Ankie an de beurt. Emiel haj nao 17 jaor, mit pien ien ut hart, angegève ruimte te wille make vur de vollegende generasie en mier tied mit zien gezin te wille durbrenge. Op enne mojje en passende manier blikte Vorst Jop terug op al zien jaore bej de club. Daornève wier ok Ankie bedankt vur o.a. ur bejdrage an de krantekemissie en ur verdienste as vrouw van de toenmalige Vorst. Emiel kreeg nog effe de microfoon onder zien snot gedowt. Hej miek van de gelegenheid gebruik um iederieën nog effe oprecht te bedanke. Emiel is ienmiddels 7 kilo zwaorder, naodat ie halverwege is mit ut verorbere van alle verkrege zakke bolognese-chips. Ok héj het angegève betrokke te wille blieve bej de jubileumfieëste. Hiernao vollegde Prins Toffel mit zien lèste weurd. En wat vur un! Op enne genadeloze, onbescheide, lompe, brute, grove, brutale, mar toch ôk wel zeer ludieke manier, klapte hej terug op alle raodsleje die um regelmaotig vur de gek gehalde han. Wie de bal kaatst, meuge um terug verwaagte. Moj gedaon dur ozze Prins, waar iederieën zichtbaar van genoot. Nao dees legendariese weurd ginge we gezameluk naor buute. De Mök is Los speulde de gebruikelukke nummers en mit de nuëdige moeite ging de mök ien de hens, mutse wiere afgepakt en diverse meense krege nog un hendje. Daornao nog lekker ongegenieërd un sigaartje gerôkt en nog tot diep ien de nacht durgefieëst. Zellufs tot zó diep dat Paul ut eindeluk wél lukte langer te blieve as Melanie.

14 fibbrewarie, Aswoensdag

Alles aover aswoensdag kunde wellicht ut beste vraoge an Frank Steeghs. Toen Frank eindeluk uut bed stapte kos hej geliek durloëpe naor de kerk vur ut assekruuske. Bej ut herringschelle zaat hej durbej asof ie efkes durvur begrave was. Wej vroege os af of dit kwaam durdat ie daags daorvur teveul gezope haj óf dur de prachtige klanke van ut mannekoër net daorvur. Woensdag hebbe wej dus bejna gezameluk opgeruumd, waornao we zien gaon ète bej ozze Prins. Ut Trio haj goed vur ôs gezurregd mit soep en brödjjes werrum vleis. Ut herringschelle was tammetjes, mar múg ut, nao alle daag intensief carnavail viere? Allemaol kapot-muuj, afgemat, lam, uutgeteld, bekaf, opgebrand, afgepeigerd, lui, gaar en uutgeput, mar wél hartstikke voldaan!

Dit jaorverslag is mit hiël veul plezier vur ollie samegesteld dur Han van de Sande, Jop Loonen en ondergetèkende. Bedankt vur ollie aandacht en tot volgend jaor!